




Literatura den Bon Dia

Ernesto E. Rosenstand



TUR COS A KEDA ATRAS

Tur su amigonan lo no desea miho luga pa keda cu bou di e palo grandi di kwihi cu tabatin ei, sinta riba poco piedra warda dia pasa.

Spera riba otro dia. Otro dia cu den existencia tabata mescos. Pa nan no tabatin diferencia, un mainta, un merdia, un atardi, y un anochi y djei nada mas. Y un di e grupo aki tabata Pedro. E miho amigo di Calixto.

E tabatin un wowo riba Carmen. Tin biaha despues di trabou e tabata purba compaña Carmen cas, ma esaki tabata core cu ne. Carmen tabata odie sin misericordia De bes en cuando e tabata sa bin cu su co'i fresco cu ne. Y mesora Carmen tabata par'e. Core cu ne.

E odio aki a bira mas grandi fo'i dia cu Pedro a bin un anochi cas di su wela busca manera di abusa di dje. For di basta dia caba e tabata cana cu e plan aki y e anochi ei el a dicidi di pone den practica. Dianan largo e tabata studia e situacion na e cas di e wela.

Un anochi pa nueb'or cu su wela a bai drumi caba el a tende un batimento na porta. Algo atraño. E tabata lesa y ora el a tende esaki el a spanta masha hopi. E oranan ei ningun hende tabatin custumber di bin cerca nan. Anto bati porta asina duro. Tabata oarce cu e persona ei tabata pa desespera. Y un momento Carmen a duda si lo e habri e porta o no.

Ma con cu a pasa e no ta corda mas, el a bai habri e porta y asina el a habrie Pedro a tene na su man rank'e trece afo. Cu un forsa di bestia herida. Sin bisa un palabra. E tabata hopi burachi y tabata hole stinki. E no a spera esaki. E no tabata sa ki tabata pasando

Prome cu e por a realisa kico tabata pasando el a hal'e hib'e p'atras di cas unda tabata scur. Claramente e tabatin mal intencion. E tabata decidido. No a dura hopi cu Carmen a reacciona y a push'e.

El a haci esaki cu asina un forsa cu el a cai abou. El a purba lanta, ma e no a logra. Curpa no tabata duna. Su pianan no por a want'e. Asina di burachi e tabata. Ora el a mir'e abou el a dale dos scop, saca careda bai cas cera porta na yabi.

Tur spanta el a sper'e bolbe, ma esaki no a sosode. E no tabatin mas forsa pa bolbe purba. Pedro no a tribi bai mas. Y for di e dia ei Carmen no kier a mir'e ni pinta. Y Pedro tampoco a bolbe acerke. Carmen no a conta ningun hende esaki.

Ma el a percura pa e no contra cu e amigonan di su tata ningun parti. Di e dia ei, p'e e amigonan di su tata no tabata sisti. Pedro menos! Nan tabata tambe causa di e sufrimento di su mama cu tabata sufri hopi y cu tabata pasa hopi trabou. Su mama mester a traha mescos cu bestia.

Carmen tabata yud'e cuanto cu e tabata por. Ma e sueldo di mata hamber cu e tabatin e pover no por a haci mas. E mester a yuda su wela tambe. Berdad cu esaki tabata haya placa di pensioen, ma esaki tabata net pa biba. Ni mas ni menos!

Segun su wela esun cu a percura pa hendenan haya pensioen di behes ta hende jong, rico cu no sa ta ki trabou e bieunan ta pasa na nan cama di behes.

14

Na cas di mayornan di Carmen miseria tabata yama miseria, trabou y mas trabou y sin cu bo tabata mira algun cambio. No ta poco a resa pidiendo cambio den e situacion den cua e tabata aden. Ma parce cu su oracion no tabata yega shelo.

Miho bisa tabata biniendo cambio, ma tabata birando mas y mas pio. Ma Josefa no tabata pa desespera. Nada tabata muestra cu lo bin cambio. Esaki Josefa tabata kere ma Dios ta grandi.

Por fin a bin loke e tabata spera. Anto na un manera cu ningun hende a spera. Tabata algo increibel. Nan a keda sorprendi.

Riba un bon dia Calixto a bira malo. Hopi malo mes. Tur hende a kere cu lo e muri. Nan a spanta masha hopi. Malesa a coi e curpa zwak di Calixto masha duro mes.

Un anochi el a spanta Josefa masha hopi. El a haya un dolo masha fuerte cu e hacie grita mescos cu porco flaco. Esunnan cu a tende a spanta masha hopi mes. Esaki a pasa di biaha.

Nan a yama docter p'e y esaki a hay'e mas morto cu bibo. E mes a spanta. Despues di a samin'e hopi bon el a bin splica Josefa gravedad di su casa, el a dun'e un inspuir y a bis'e cu si esei no yuda ento Calixto lo muri. El a yama ambulance pa hib'e hospital. Aya el a keda basta dia y poco poco el e recupera.

Docternan na hospital a splik'e su gravedad y a bis'e cu si e sigui bebe ento si lo e coi awa blou. E biaha aki di chiripa el a scapa. Otro biaha esei lo no ta bai ta e caso. Asina ta cuida curpa. Esei si bo kier biba mas largo.

Si bo bolbe haya loke bo a haya otro biaha e ora si no tin awa pa laba. Tabata e conseho di docternan.. Y nos aki na hospital no por haci mas p'abo. Bo situacion dia bo a drenta den hospital tabata hopi delicado. Loke nos ta spiertando bo no ta nada exagera, asina ta cuida curpa. Calixto a comprendemasha bon su situacion. Y cu ta tempo pa bai biba di otro manera.

Ningun sa ki santo a yuda, ma Calixto a comprende su situacion y el a stop completamente di bebe. Naturalmente cu esei no a bai di a facil ei. Dor di tanto tempo cu e tabata bebe e curpa tabata domina pa alcohol. Y dor cu e no tabata haya esaki e tabata bira fastioso. Curpa tabata pidi alcohol.

Tin biaha e tabata insoportabel. Na cuminsamento Josefa no por a wanta cu ne den cas. Hende cu a custumbra asina hopi cu rom no ta laga esaki asina asina. Y si e hacie tog e ta hay'e na cuminsamento cu problema. Pa nan alcohol ta bira nan di dos naturalesa.